



Niuertoq piniartorlu

Otto Umerineq Kuummiuni niuertuvoq, imminulli ilisaritissaguni niuertutut piniartutullu taarusuppoq.



Otto Umerineq Pilersuisumi Kuummiuni.

Otto niuertorpaaluit assigalugit ukiut arlallit KNI-mi sulinuuvoq, taamanikkut 20-nik ukioqarluni KGH-p nalaani pisiniarfiup silarsuaanut appakaakkami. Siullermik pisiniarfimmi ikiortitut.

- Taamani pisiniarfimmi ningiup sulilersinnaanersunga arlaleriarluni saaffigisarpaanga, naggataatigut misilikkusummeriarakku akuerinikuaara, taamaattorli takorloorsimanngisaannarpara pisiniarfimmi sulisuuinnarnissara kingornalu niuertunngornissara, Otto oqaluttuarpoq.

Ottomi piniartussatut perorsagaavoq.

- Ilitsorivunga ataataga piniaqatigalugu. Aasami umiatsiamik, ukiukkut qimussimik. Taamaattumik sumut ingerlanissara qularinngilluinnarnikuuara, Otto oqarpoq.



Ottolli aqutissaa allaanerusussaasimavoq. Ukioq manna niuertutut ukiut 24-nngussavai.

Otto 58-inik ukioqarpoq, nuliaqarpoq tallimanillu qitornaqarluni. Aataajuvoq, arfinilinnik aamma er-nutaqarami. Otto Kuummiuni niuertuvoq. Kuummiut ullumikkut 248-nik inoqarpoq, ukiullu kingul-liit eqqarsaatigissagaanni inuerukkiartorsimalluni.

Pisiniarfimmi ikiortitut sulinera uterfigeqqilaarutsigu.

Otto sulileqqaarami nioqutissalerisarsimavoq, sulininilu sungiulluariamiuk karsi ilinniarlugu aal-lartissimallugu. Taamaalluni allaffimmi sulisutut misileeqqusaagami allaffimmiutut aamma inger-lasimavoq.

- Ukiut taakku, 1980-ikkut ingerlaneri, uannut ineriartuutaasimaqaat. Sulilerpunga pisiniarfilerinerup silarsuaanik ilisimasaqaavinnanga, Otto oqaluttuarpoq.

KGH-p ataani pikkorissarnerit arlallit Ottop peqataaffigisarsimavai, KNI-mullu ikaarsaarnerup nalaani niuertuunermut naatsorsuutilerinerumullu pikkorissarnerit aamma peqataaffigisarsimallugit.



Kuummiuni Pilersuisumi sulisut ilaat.



Niuertunngoqqaarnera

Erniinnannguaq martsimi KNI-mi niuertunngorniarneq ingerlanneqaqqilerpat Otto peqataasussavoq, pissangaqaarlu.

- Aatsaavissuaq ilinnialerama qilanaaqaanga. Maani Kuummiuni niuerneq ingerlalluarualuartoq nu-taanik sakkussanik inuttullu alloriassutaasinnaasunik pissarsinissara iluaqutaassaqaat. Maanimi niuertuinnartut sulingilanga. Mittarfilerineq, aningaaserivilerineq, tankilerineq umiarsualerinerillu sulias-sama aamma ilagaat, Otto oqarpoq.

Ottop niuertunngoqqaarnera aamma oqitsuinnaasimanngilaq.

- Taamani 1996-imi niuertunngoqqaarama oqarsinnaavunga ukioq ataaseq putsup iluaniillunga. Nalorsarnikooqaanga, ukiorlu ataaseq qaangiummat paasitinneqarpunga niuertussamik allamik ujaa-sisoqalersoq. Ittutsinnulli siunnersortaasup ittorput pisimavaa, atagu ukioq ataaseq aatsaat qaangiuppoq. Misiliiseqqaalaartigu. Taamani periarfissinneqaqqikkama allatut iliortariaqarlunga aalaja-ngerpunga. Inuttut tunuarsimaartuujuaannarnikuuvunga, niuertutulli sulissaguma tamanna allan-gortittariaqarpara. Tassanngaalli sukanganerusumik aqutsilerpunga, ukiullu tulliuuttut ingerlanerini ingerlanerput pitsanngoriartuaalerpoq, massakkullu sinneqartoortuaannarpugut naak Kuummiut inu-erukkiartornikuugaluartoq, Otto tulluusimaarluni oqarpoq, ilanngullugu oqaatigalugu suleqatigiit qulingiluaallutik (ilinniartooq ilanngullugu) suleqatigiilluarterujussuullutik, niuertutulli Tasiilap eqqaa-miunut Sermiligaamut, Tiilerilaamut Kulusummullu ikiortaajartorluni aamma angalasarluni.

Otto imminut piniartutut aamma taajumavoq. Sunngiffimmini pinialorusaartuarpoq, puisitarpassua-milu saniatigut arfineq marlunnik aamma nannunnikuusimalluni.

- Qilalukkallu katillugit 39-t, Otto naggasiivoq.